

Gesto por la Paz

PRENTSAURREKOA

BAKEAREN ALDEKO KOORDINAKUNDEAK ANTOLATUTAKO BIKTIMEKIKO ELKARTASUNAREKO X. EKITALDIAREN AURKEZPENA

Gure baitaren zati dira

Oraintsu ospatu da Vitoria-Gasteizeko 'Principal' Antzokian terrorismoaren Biktimen Omenaldi eta Aitorpenerako III. Ekitaldi Instituzionala. Horren bitartez, terrorismoaren milaka biktima egotea memoria kolektiboan gordetzeak gure gizartearentzat duen garrantzia berretsi nahi izan da. *Bizirik eutsi diezaiozun gomutari eta bizirik eutsiko diogu itxaropenari.* Euskal Herriko Bakearen aldeko Koordinakundearen iritziz ere haien gomutaren garrari bizirik eutsi behar zaio eta, horregatik, **Biktimekiko Elkartasunerako X. Ekitaldia** ospatuko dugu Bilbon, abenduaren 20an, igandez.

2000. urtean beste heriotzarik ez izatea *–Nunca más. Gehiagorik ez–* eskatuz burutu genuen lehenengo ekitalditik aurrera, goiburu asko erabili izan dugu, baina guztiguztietan errebindikazio nagusi batzuk jasoz, hala nola: elkartasuna irainaren aurrean, aitorpena oinazearen aurrean eta gomuta ausentziaren aurrean. Gaur, hamar urte beranduago, dei egiten diegu herritarrei, biktimak ***gure baitaren zati direla*** aldarrikatuko duen ekitaldian parte har dezaten.

Ekitaldi honetan, biktimak zergatik dauden gure baitan adieraziko dugu partehartzaile bakoitzak eramango dituen esaldien bitartez eta guztion artean 'víctima' hitzari dagokion 'V' hizkia eta 'solidaridad', 'sociedad' eta 'ser' hitzei dagokien 'S' hizkia osatuz.

Gure baitaren zati direla nabarmendu nahi dugu, gizaki izanik, elkartasunez jokatu behar dugulako geure izenean eraso bortitza jasan dutenekin. ***Gure baitaren zati direla*** uste dugu, kolektibo bezala, gizarte bezala, beraiek, biktimek, zuzenean jasan zuten guztion aurkako izuak egindako erasoari erantzun behar diogulako. ***Gure baitaren zati direla*** uste dugu, burutik pasatu ere egiten ez zaigulako biktimen memoria, biktimek esan nahi dutena, beraien testigantzak adierazten duena kontuan hartzen ez duten etorkizunik. Horrela baizik ez da egongo etorkizun duin eta zuzenerako lekurik.

Izuz bustitako 50 urteren ostean, biktimak dira indarkeriaren erabilerari zilegitasuna kentzeko arrazoi nagusia. Beren aitorpena ezin da ekitaldi publiko batera murriztu; gure gizartearen indarkeriaren aurkako konpromiso sendoa izan behar du nahitaez, gizarte zein politika mailan, indarkeriak ez duela, ez izan ezta izango ere, inolako justifikaziorik edo funtsik; gainera, oraindik defenditzen dutenen iritzia aurka, ez dagoela horren beharrik eta ez duela erabiltzen dutenei arrazoi txikiena emate bezala interpreta daitekeen inolako ordainik jasoko konbentziturik.

Gesto por la Paz

Indarkeria terroristak dezente desitxuratu ditu gure gizartean zein inguruan argi eta garbiak izan beharko zuketen balio eta oinarriak eta horregatik nahitaezkoa da erotasun honekin amaitzea. Izuak ez du ezertarako balio izan, samina saminaren gainean eragiteko bakarrik eta, hori dela-eta, berehala desagertu behar du gure bizitzetatik. Eta, batez ere, hainbeste urtetan gauzatutako terrorismoa guztik ezmorala izan da eta gaur egun ere ezmorala da, milaka biktima eragin duelako, eta gure gizartetik desagertu egin behar du behin-betiko.

Bakearen aldeko Koordinakundeak bidea eskaini nahi die herritar guztiei, denok batera indarkeriaz eta honek eragindako minaz aspertuta eta nekatuta gaudela adieraz dezagun. Ezinbestekoa da terrorismoaren aurkako konpromiso publikoa, urteotan beren egitasmoak inposatzen eta gizartearen borondate politikoa menderatzen saiatu direnek ez indarkeria, ez beren azalpenak ez indarkeria testuinguru jakin batean sartzeko saiakerak onartzen ez dituen herritarren gehiengo zabalaren gaitzespena suma dezaten. Biktimekiko elkartasuna adierazteko ekitaldiak antolatzen hamar urte eman ondoren, ezinbestekoak direla uste dugu gaur ere, indarkeriari zilegitasuna kentzen dion lehenengo arrazoia beraiek badira ere, guk geuk, gainerako herritarrok nahitaez geure gain hartu behar dugulako indarkeriari zilegitasuna kentze hori egia bihurtzeko ardura.

Ekitaldi honetan, Bakearen aldeko Koordinakundeak biziaren eta itxaropenaren aldeko apustu tinkoa egingo du terrorismoak eskaintzen dituen heriotzaren eta saminaren aurrean. Beste alde batetik, izu honek eragindako biktimak inoiz eta inola ere ahaztu behar ez dituen gizartearen berreraikuntza moralaren aldeko apustua ere egin nahi dugu. Eta aurten, biktimak ***gure baitaren zati direla*** aldarrikatu nahi dugu.

Abenduaren 20an, igandez, Doña Casilda Parkean (Gregorio de la Revilla kalearen parean), 13'00an ospatuko dugu gure baitaren zati diren Biktimekiko Elkartasunerako X. Ekitaldia. Dei egiten diegu herritar guztiei parte har dezaten.

COORDINADORA GESTO POR LA PAZ DE EUSKAL HERRIA
EUSKAL HERRIKO BAKEAREN ALDEKO KOORDINAKUNDEA

2009ko abenduaren 12a

